

SDP podržava inicijative Udruženja poslodavaca Federacije BiH

Predsjednik Savjeta za ekonomski razvoj SDP-a BiH i kandidat za Parlamentarnu skupštinu BiH Anto Domazet izjavio je danas na pres-konferenciji da SDP BiH podržava inicijative koje je Udruženja poslodavaca Federacije BiH uputilo političkim partijama u BiH.

Suština tih inicijativa je da se izvrši reforma poreza na dodatnu vrijednost (PDV) i da se plaćanje PDV-a vrši po naplati faktura za obrtnike i za mikro i mala preduzeća.

- Osim toga, podržavamo i rasterećenje privrede na svim nivoima, što je prije svega pitanje smanjenja poreza i doprinosa kako bi se svi efekti iz toga prebacili na radnike, na povećanje plaća. U tom cilju radimo na svom projektu kojim bismo još više povećali smanjenje i omogućili da plaće rastu još više – potvrdio je Domazet.

Po njegovim riječima nije problem koliko je opterećenje plaća, nego kolike su plate. One trebaju, kako kaže, biti na novom nivou odnosno da "uključiti ono što se ranije primalo na ruke".

- Po tom osnovu plaće će se moći povećati barem za 200 KM. Prosjek koji se koristi u Federaciji BiH od 850 ili 880 KM je fatamorgana. Radnici u realnom sektoru zarađuju oko 650 KM, a 58.000 osoba u 2017. godini primalo je plaće od 500 KM. Kakve penzije mogu oni očekivati? To nije radništvo – poručuje Domazet.

SDP će pokrenuti pitanje minimalne to jest zajamčene plaće budući da ne ostvaruje društveno ekonomsku ulogu.

Također, kaže da će se insistirati da se osigura potreban standard u privrednim društvima korištenjem mogućnosti da se topli obrok organizirano provodi do pet KM po zaposlenom bez gotovinskih isplata.

- To bi trebalo biti u korist zdravlja uposlenih – dodaje Domazet.

Korisnim smatra da se prijedlozi, poput ovih od Udruženja poslodavaca FBiH, trebaju čuti i od sindikata.

- Borit ćemo se za poboljšanje poslovne okoline, ali ćemo snažno insistirati da efekti poboljšanja rasterećenja poreza i doprinosa idu u korist radništva. Želimo u prijedlozima koje je iznijelo Udruženje poslodavaca FBiH da afirmiramo pristup

zasnovan na političkoj ekonomiji reformi, te da vidimo u svakom reformskom zahvatu kakva će biti pozicija rada – radništva u koje uključujemo radnike u realnom sektoru, radnike koji rade u industriji znanja, javnim uslugama, sitne poduzetnike, obrtnike, farmere, samozaposlene, freelensere i one slojeve koji su odbačeni van brige društva i države – rekao je Domazet.